

UPA2022/109: Tasiilami erngup nukinganik innaallagissiorfik allilerniarlugu nukissiummik nutaamik innaallagissallu aqputaanik pilersitseqqullugit naalakkersuisut peqquneqarnissaannik inatsisartut aalajangiiffigisassaattut siunnersuut.

Siunnersuuteqartoq Inatsisartunut ilaasortaq Lars Poulsen, Siumut

UPA2022/136: Tasiilami erngup nukissiorfiup allilernerqarnissaanik Naalakkersuisut peqquneqarnissaannik siunnersuut.

Siunnersuuteqartut Inatsisartunut Ilaasortaq Harald Bianco & Knud Mathiassen, Inuit Ataqatigiit

pillugit

Sanaartornermut Ataatsimiititaliap

siunnersuutip aappassaaneerpeqarneranut

ISUMALIUTISSIISUTAA

Ataatsimiititaliap suliarinninnermi ilaasortarai:

Inatsisartunut ilaasortaq Siverth K. Heilmann, Atassut, Siulittaasup tullia

Inatsisartunut ilaasortaq Agathe Fontain Inuit, Ataqatigiit,

Inatsisartunut ilaasortaq Mariane Paviasen, Inuit Ataqatigiit

Inatsisartunut ilaasortaq Anders Olsen, Siumut

Inatsisartunut ilaasortaq Jens Kristian Therkelsen, Siumut

UPA 2022-imi ulloq 27. April 2022 siullermeerinninnerup kingorna ataatsimiititaliap siunnersuut misissorpaa.

Siunnersuutip imarisaa siunertaalu

Tasiilami erngup nukissiorfiata allilernerqarnissaanut taasissutissat marluk taakku tunngasuteqarput, tamannalu tunngavigalugu Inatsisartuni suliarineqarput.

Siunnersuuteqartoq UPA2022/109-mut siunnersuuteqarnermini Tasiilami erngup nukissiorfiata siunissamut qulakkeerpeqarnissaata pisariaqarnera tunngavilersuutigaa. § 37 tunngavigalugu apeqput (nr. 190-2021) siunnersuuteqartumit apeqputigineqartumut Naalakkersuisunit akissuteqaatigineqartoq innersuussutigineqarpoq, tassani maannakkut siunissamilu erngup nukissiorfiata pilersuina naammannersoq allilerisoqassappallu aningaasartuutit qanoq annertutiginiisaanut naatsorsuutit pineqarput.

Kommunimit pilersaarutigineqartut siunnersuuteqartumit ilisimatitsissutigineqartut soorlu illoqarfimmi sanaartortoqassappat; assersuutigalugu mittarfiliortoqassappat illuliortitertoqassappallu pilersuisinnaassusia allilerisoqarnissaalu pisariaqassasoq siunnersuuteqartoq isumaqar-

poq. Erngup nukissiorfiata ilaatigut inuussutissarsiutinik ineriartortitsiniarluni suliniutaaju-maartunut ikorfartuutaajumaartoq, mittarfiliortoqarnissaanullu sunniuteqarumaartoq siunnersuuteqartup naatsorsuutigaa. Alliliinissaq avatangiisimut silap pissusaanullu pitsaqaataassasoq siunnersuuteqartoq isumaqarpoq.

Illoqarfimmut nuuttartut inuussutissarsiornikkut ilinniartoqarnikkullu ineriartornerup nukissiu-teqarnermut pilersuisinnaassutsimik amigaateqartitsilissasoq naatsorsuutigineqarsinnaasoq siunnersuuteqartup UPA2022/136-mut siunnersuuteqarnermini tunngavilersuutigaa. Tasiilami nukissiu-teqarnermik pisariaqartinneqartoq pigineqalissappat siumut isigisumik suliniuteqar-toqarnissaa pisariaqartoq, aalisakkanik suliffissuarnik nutaanik pilersitsisoqassatillugu, ilin-niarfiliortoqassatillugu illoqarfilla nutaamik mittarfittaassappat pingaaruteqartorujussuus-saasoq siunnersuuteqartoq aamma isumaqarpoq.

Ukiukkut taartarnerata nalaani juullillu nalaani qamittoorneq pisarmat erngup nukissiorfia illoqarfiup pisariaqartitaanik pilersuisinnaajunnaareersoq, siunnersuuteqartortaaq isumaqar-poq.

Siunnersuutip Inatsisartuni siullermeerlugu suliarineqarnera

Matumani siunnersuutit marluk pineqartut siullermeerneqarneranni tigulluarneqarput. Erngup nukissiorfiisa allilerneqartariaqarnerat isumaqatigiissutigineqarpoq.

Allannguutissatut siunnersuut Naalakkersuisut akissuteqarnerminni saqqummiuppaat:

”Politikkikkut suliarinninnerup ingerlaqqinnissaanut aallaavissatut, avataaneersut inu-iaqatigiit aningaasaqarneranni sunniutaasussanik misissueqqissaarnerat ingerlanneqas-sasoq, Tasiilami erngup nukinganik innaallagissiorfiup allilerneqarnissaanut suliap ingerlaqqinnissaanut piunasaqaatigineqassasoq, pillugu Inatsisartut aalajangiiffigisas-saattut siunnersuut.”

Immikkoortup aappasaaneerlugu suliarineqannginnerani Sanaartornermut ataatsimiititaliamit suliarineqartussanngortinneqarpoq.

Nunalerinnermut, Imminut Pilersornermut, Nukissiutinut Avatangiisinullu Naalakkersuisumik siunnersuuteqarnerneq

Ataatsimiititaliap siunnersuummik suliaqarnermini Naalakkersuisoq siunnersuinissamut agger-sarneqarnissaa naapertuuttoq ataatsimiititaliaq isumaqarpoq. Pissutsit marluk qulaajarne-qarnissaat siunnersuinissami siunertarineqarpoq. Pineqartup aappaani, ataatsimiititaliamit immikkoortut Inatsisartuni suliarineqarnissaat kissaatigineqarmat Naalakkersuisut allanngu-utissatut siunnersuutaat sunik kinguneqassanersoq qulaajarnissaa ataatsimiititaliamit kissaa-tigineqarpoq. Pineqartup aappaani immikkoortunut pilersaarummi anguniarneqartut nr. 13 aamma 17, ilaatigut Maniitsumi erngup nukinganik pilersuisinnaasumik pilersitsiniarnermi periarfissanik suliaqarnerisa killiffianut tunngassuteqarpoq. Siunnersuinermut aggersaassut Naalakkersuisullu oqaaseqaataat ilanngussatut ilanngunneqarput.

Ataatsimiititaliap siunnersuummik suliarinninnera

Siunnersuummut tunuliaqutaasoq:

Siunnersuuteqartut siunnersuuteqarnerminnut tunngavilersuutaat immikkoortup siulianiittoq aallaqqaatitut innersuussutigineqassaaq. Tamatuma avataatigut ataatsimiititaliamit oqaatigineqassaaq, Tasiilami erngup nukinganik innaallagissiorfianik alliliinissamik pilersaarutit nutaa-jungmimmata. Tassunga atatillugu ataatsimiititaliamit Naalakkersuisut Nukissiutinik Imermillu pilersuinermit immikkoortumut pilersaarutaat innersuussutigineqarpoq, tassani 2030-p tungaanut pisortat nukissiutinik imermillu pilersuinerat allaaserineqarpoq.

Immikkoortumik pilersaarut anguniakkanik arlalinnik imaqarpoq, taakkunannga tulliuuttu matumani ilanngunneqartariaqartutut ataatsimiititaliamit isigineqarput:

"Anguniagaq 11: Maannakkut illoqarfinni erngup nukinganik nukissiorfiusuni arfinilinni aningaasaliisoqassaaq, taakku erngup nukinga, eqqakkanit kissarnek allanillu nukissiorfinit ataavartunik peqatigitillugu illoqarfinni innaallagissamik kiassarnermillu tamakkiisumik pisariaqartitsinermik matussusiisinaassanerat qulakkiissallugu.

Anguniagaq 14: Tasiilami erngup nukinganik nukissiuuteqarnermik pilersuineq pitsanngorsaanermik suliarisat arlallit, 2020-p tungaanut naammassineqartussat aqutigalugit annertusarneqassaaq."

Taamaammat siunnersuutit pineqartut marluk siullermeerlutik suliarineqarneranni tigulluarneqarnerat ataatsimiititaliamut tupaallannangilaq.

Tasiilami erngup nukissiorfiata allilerneqarneranit inuussutissarsiornermut periarfissat kisiisa pinnagit, aamma avatangiisnut silallu pissusaanut iluaqutissartaqartoq Naalakkersuisunit naatsorsuutigineqarnera oqaatigineqassaaq. Tasiilami erngup nukissiorfianik alliliinissaq tassungalu aningaasalersuinissamik misissuineq aallartereerneqarnikuusoq Naalakkersuisut 2021-mi septembarimi, § 37-mut apeqqummut nr. 190-2021-mut akissuteqaatigaat, tamanna ataatsimiititaliamit pitsaasutut isigineqarpoq.

Naalakkersuisut allannguutissatut siunnersuutaat:

Siunnersuutip siullermeerlugu suliarineqarneranittaaq Naalakkersuisunit tulliuuttu ilisimatit-sissutigineqarput:

"Suliassaq maannakkorpiaq aningaasaqarnikkut imminut akilersinnaasutut isikkoqanngitsoq, ingerlatsinermi aningaasaqarnikkut naatsorsuinerit Nukissiorfiup suliassarisaasa ajoraluartumik takutippaat. Tamatumuuna Naalakkersuisut aallaaviatigut missinersu-siornermut naatsorsuutinullu inatsimmi § 6-imi aalajangersakkat malillugit suliassap taarsigassarsianik aningaasalersorneqarnissaanut peqataanissamut periarfissaqartinneqanngillat."

Missingersuusiornermut naatsorsuutinullu inatsimmi § 6-imi aalajangersakkat, aningaasaliinissamut periarfissat arlallit ilagimmassuk Naalakkersuisunit innersuussutigineqartut ataatsimiititaliamit oqaatigineqassaaq. Missingersuusiornermut inatsimmi suut allat aningaasali-

nissamik periarfissaanersut, imaluunniit allatut iliornikkut inatsisitigut aningaasaliisoqarnissaanut qulakkeerinnittussamik tunngavissaqarnersooq Naalakkersuisut akissuteqarnerminni isummerfigisimanngilaat.

Suliap ingerlaqqinnissaani, inuiaqatigiit aningaasaqarnerinut sunniutissanik naliliineq avataaneersunik ingerlanneqarnissaa piumasqaataassasoq siusinnerusukkut oqaatigineqartut Naalakkersuisunit siunnersuutigineqarpoq.

Suliami inaarutaasumik aalajangiisoqannginnerani itinerusumik misissuisoqartariaqartoq ataatsimiititaliamit Naalakkersuisut isumaqatigineqarput. Inuiaqatigiit aningaasaqarnerinut sunniutissanik naliliineq misissuinerit arlallit ilaannarivaat. Taamaattumik ataatsimiititaliamit tulliuttut siunnersuutigineqarput:

- Kingusinnerpaamik UKA 2022-mut Naalakkersuisut inuiaqatigiit aningaasaqarnerinut sunniutissaanik naliliinerup inerneru saqqummiutissavaat
- Aalajangiiffigisassatut siunnersuummi tunngavigineqartussanik suliniutissamut sanaartornissamut, ingerlatsinermut aningaasalersuinissallu ingerlanneqarnissaanut pisariqartinneqartunik suliaqarnissaat Naalakkersuisut aallartissavaat. Innaallagissiorfiup allilerneqarnissaanut innaallagissap illoqarfimmut aqputaanik nutaamik pilersitsinissap eqqarsaatigineqarnissaa aammalu innaallagissap aqputaata pitsaasumik atorsinnaansaata il. il. qulakkeerneqarnissaat ataatsimiititaliamit piumasarineqarpoq.
- Kingusinnerpaamik UKA 2023-mut suliniutip ingerlanneqarnissaanut Naalakkersuisut siunnersuut saqqummiutissavaat.

Taamaattumik Tasiilami erngup nukissiorfiata allilerneqarnissaanut suliap ingerlatiinnarneqarnissaanik Naalakkersuisut peqquneqarnissaat Inatsisartut aalajangiinerasigut qulakkeerneqarnissaa pingaaruteqartoq ataatsimiititaliaq isumaqarpoq. Tamanna tunngavigalugu allannguutissatut siunnersuut ataani allassimasooq ataatsimiititaliamit saqqummiunneqarpoq:

Tasiilami erngup nukinganik innaallagissiorfiup allilerneqarnissaanut Naalakkersuisut suliniuteqarnissamik peqquneqarnissaannik inatsisartut aalajangiiffigisassaattut siunnersuut.

Siunnersuutip aningaasaqarnikkut allaffissornikkullu kingunerisassai.

Siunnersuuteqartup aamma Naalakkersuisuisut Pisortanut, namminersorlutik inuussutissarsiuteqartunut innuttaasunulluunniit aningaasaqarnikkut allaffissornikkullu kingunerisassatut naatsorsuutaannut ataatsimiititaliaq ilassutissaqanngilaq.


Ataatsimiititaliap inassuteqaataa:

Ataatsimiititaliamit **allannguutissatut siunnersuutigineqartup akuersissutigineqarnissaa ataatsimiititaliamit isumaqatigiittumit** inassutigineqarpoq.


21. maj 2022

UPA2022/109/136

Taamatut oqaaseqarluni isumaliutissiisummillu allassimasutut paasinnilluni matumuuna ataatsimiititaliap siunnersuut aappassaaniigassanngortippaa.




Sivert K. Heilmann
Siulittaasup tullia




Agathe Fontain



Mariane Paviasen



Anders Olsen



Jens Kristian Therkelsen